

PONTIFICIUM INSTITUTUM UTRIUSQUE IURIS

# APOLLINARIS

COMMENTARIUS IURIS CANONICI

## Acta Summi Pontificis Pii Pp. XII

### CONSTITUTIO APOSTOLICA

DE STATIBUS CANONICIS INSTITUTISQUE SAECULARIBUS CHRISTIANAE PERFECTIONIS ADQUIRENDÆ. \*

PIUS EPISCOPUS

SERVUS SERVORUM DEI

AD PERPETUAM REI MEMORIAM

Provida Mater Ecclesia, quanto studio maternoque affectu contendere, ut suae praedilectionis filios,<sup>1</sup> qui totam vitam Christo Domino mancipantes, Ipsum per viam consiliorum libere et ardue sequuntur, tam coelesti proposito et angelica vocatione<sup>2</sup> dignos iugiter redderet ac eorum vivendi rationem sapienter ordinaret, frequentissima Pontificum, Conciliorum, Patrum documenta et monumenta testantur, atque integer historiae ecclesiasticae cursus omnisque canonicae disciplinae ratio, ad nostra usque tempora, luculenter demonstrat.

Profecto, inde a primis rei christianaee incunabulis, Christi<sup>3</sup> et Apostolorum doctrinam atque exempla ad perfectionem allicientia,<sup>4</sup> Ecclesia reapse magisterio illustrare sagedit, secure docendo qua ratione vita perfectioni dicata ducenda esset apteque componenda. Opera autem ministerioque suo ita impense plenam Christo deditioem et consecrationem

\* *AAS*, XXXIX (1947) 114-124.

<sup>1</sup> PIUS XI, *Nuncium radiophonicum*, 12 febr. 1931 (ad religiosos). Cfr. *AAS*, XXIII (1931), p. 67.

<sup>2</sup> Cfr. TERTULLIANUS, *Ad uxorem*, lib. I, c. IV (ML, 1, 1281); AMBROSIUS, *De virginibus*, I, 3, 11 (ML, 16, 202); EUCHERIUS LUGDUN., *Exhortatio ad Monachos*, 1 (ML, 50, 865); BERNARDUS,

*Epistula CDXLIX* (ML, 182, 641); id., *Apologia ad Guillelmum*, c. X (ML, 182, 912).

<sup>3</sup> Mt. XVI, 24; XIX, 10-12, 16-21; Mc. X, 17-21, 23-30 Lc. XVIII, 18-22, 24-29; XX, 34-36.

<sup>4</sup> 1 Cor. VII, 25-35, 37-38, 40; Mt. XIX, 27; Mc. X, 28; Lc. XVIII, 28; Act, XXI, 8-9; Apoc. XIV, 4-5.

fovitur et propagavit, ut primis temporibus communitates christianaee consiliis evangelicis bonam terram semini paratam optimosque fructus securum promittentem ultro offerebant,<sup>5</sup> pauloque post, ut ex Patribus Apostolicis et antiquioribus ecclesiasticis scriptoribus facile comprobari potest,<sup>6</sup> in diversis ecclesiis vitae perfectionis professio adeo iam floruerit, ut ipsius sectatores, veluti ordinem classemque socialem variis nominibus — ascetarum, continentium, virginum, aliisque — clare recognitam et multis probatam atque honoratam,<sup>7</sup> in ecclesiasticae societatis sinu inciperent constituere.

Saeculorum decursu, Ecclesia Christo Sponso fidelis sibique semper constans, sub Spiritu Sancti ductu, continuato certoque incessu, usque ad conditum hodiernum Canonici Iuris Codicem status perfectionis disciplinam pedetemptim evolvit. In illos materne inclinata, qui animo volenti diversis formis externe ac publice vitae perfectionem profitebantur, eisdem omnimodis in tam sancto proposito, dupli respectu favere numquam destitit. Singularem in primis, semper tamen coram Ecclesia et publica ratione factam, perfectionis professionem — ut priscam illam ac venerandam, quae liturgice peragebatur, virginum benedictionem et consecrationem<sup>8</sup> — Ecclesia ipsa non solum recepit ac recognovit, sed sapienter sanxit strenueque defendit, plures etiam eidem attribuens canonicos effectus. Praecipuus tamen Ecclesiae favor diligentiorque cura, erga illam perfectionis plenam professionem strictius publicam, a primis temporibus, post pacem constantinianam adeptam, iure meritoque conversa sunt atque exercita, quae in societatibus collegiisque emittebatur ex ipsius venia, approbatione, iussu, erectis.

<sup>5</sup> Lc. VIII, 15; Act. IV, 32, 34-35; 1 Cor. VII, 25-35, 37-38, 40; EUSEBIUS, *Historia ecclesiastica*, III, 39 (MG. 20, 297).

<sup>6</sup> IGNATIUS, *Ad Polycarp.*, V (MG. 5, 724); POLYCARPUS, *Ad Philippen.*, V, 3 (MG. 5, 1009); IUSTINUS PHILOSOPHUS, *Apologia I pro christianis* (MG. 6, 349); CLEMENS ALEXANDRINUS, *Stromata* (MG. 8, 224); HYPOLLITUS, *In Proverb.* (MG. 10, 628); id., *De Virgine Corinthia* (MG. 10, 871-874); ORIGENES, *In Num., hom. 2, 1* (MG. 12, 590); METHODIUS, *Convivium decem virginum* (MG. 18, 27-220); TERTULLIANUS, *Ad uxorem*, lib. I, c. VII-VIII (ML. 1, 1286-1287); id., *De resurrectionis carnis*, c. VIII (ML. 2, 806); CYPRIANUS, *Epistola XXXVI* (ML. 4, 327); id., *Epist. LXII*, II (ML. 4, 366); id., *Testimon. adv. iudeos*, lib. III, c. LXXIV (ML. 4, 771);

AMBROSIUS, *De viduis*, II, 9 et sqq. (ML. 16, 250-251); CASSIANUS, *De tribus generibus monachorum*, V (ML. 49, 1094); ATHENAGORAS, *Legatio pro christianis* (MG. 6, 965).

<sup>7</sup> Act. XXI, 8-10; cfr. IGNATIUS ANTIOCH., *Ad Smyrn.*, XIII (MG. 5, 717); id., *Ad Polyc.*, V (MG. 5, 723); TERTULLIANUS, *De virginibus velandis* (ML. 2, 935 sqq.); id., *De exortatione castitatis*, c. VII (ML. 2, 922); CYPRIANUS, *De habitu virginum*, II (ML. 4, 443); HIERONIMUS, *Epistula LVIII*, 4-6 (ML. 22, 582, 583); AUGUSTINUS, *Sermo CCXIV* (ML. 38, 1070); id., *Contra Faustum Manichaeum*, lib. V, c. IX (ML. 42, 226).

<sup>8</sup> Cfr. OPTATUS, *De schismate donatistarum*, lib. VI (ML. 11, 1071 sqq.); *Pontificale Romanum*, II: *De benedictione et consecratione virginum*.

Quam arcte atque intrinsece, historia sanctitatis Ecclesiae et apostolatus catholici, cum historia fastisque vitae religiosae canonicae, Spiritus Sancti iugiter vivificantis gratia, mira varietate in dies subcrescentis et nova magis magisque altiore atque firmiore unitate roboratae, coniuncta sit, in comperto apud omnes est. Nihil mirum, si Ecclesia, etiam in iuris provincia, agendi rationem fideliter retinens, quam providens Sapientia Dei clare innuebat, ita statum canonicum perfectionis, consulto prosequuta fuerit et ordinaverit, ut meritoque supra ipsum, aedificium ecclesiasticae disciplinae, tamquam supra unum ex angularibus lapidibus superaedificare voluerit. Hinc, in primis status publicus perfectionis inter tres praecipuos ecclesiasticos status recensitus fuit, atque ex ipso Ecclesia secundum personarum canonicarum ordinem gradumque unice petivit (c. 107). Res sane digna quae attente ponderetur: dum alii duo canonicarum personarum ordines, scilicet clericorum et laicorum, divino iure, cui ecclesiastica adiungitur institutio (cc. 107, 108, § 3), ex Ecclesia petuntur, quatenus ipsa est Societas hierarchice constituta et ordinata; haec media, inter clericos et laicos, religiosorum classis, quae utrisque clericis et laicis communis esse potest (c. 107), ex arcta peculiarique relatione ad Ecclesiae finem, sanctificationem nempe, efficaciter, rationibusque adaequatis prosequendum, tota desumitur.

Neque haec fuerunt satis. Ne professio publica ac solemnis sanctitatis frustraretur atque in cassum cederet, Ecclesia, hunc canonicum perfectionis statum, semper maiore rigore in societatibus recognoscere tantum voluit ab ipsa erectis atque ordinatis, scilicet in Religionibus (c. 488, 1º), quarum generalis forma et ratio, post maturum lentumque examen, magisterio suo probaverat, quorum in singulis casibus institutum atque statuta non solum doctrinaliter et abstracte, semel iterumque ad trutinam revocaverat, sed facto et reapse experta erat. Haec in iure Codicis ita sunt severe et absolute definita, ut nullo in casu, ne per exceptionem quidem, admittatur canonicus status perfectionis, nisi ipsius professio in Religione emittatur ab Ecclesia approbata. Denique, canonica status perfectionis, qua status publici, disciplina, ita ab Ecclesia sapienter ordinata fuit, ut pro Religionibus clericalibus, in illis generatim, quae clericalis dioecesi locum obtineret (cc. 111 § 1, 115, 585).

Postquam Codex Pianus-Benedictus, in Parte Secunda Lib. II Religiosis dicata, diligenter collectam recognita, atque accurate expolita Religiosorum legislatione, statum canonicum perfectionis, sub respectu etiam publico, multipliciter confirmaverat atque incepturn opus Leonis XIII f. m. in sua immortali Constitutione « Conditae a Christo »<sup>9</sup> sapienter perficiendo, Congregationes votorum simplicium inter stricte

<sup>9</sup> Const. *Conditae a Christo Ecclesiae*, 8 dec. 1900: cfr. LEONIS XIII *Acta*, vol. XX, pp. 317-327.

sumptas Religiones admiserat, nihil in disciplina status canonici perfectionis addendum esse videbatur. Ecclesia tamen, magna qua gaudet animi mentisque largitate, tractuque vere materno, brevem titulum legislationi religiosae, veluti peropportuni complementi gratia, adiungendum censuit. In ipso (tit. XVII, Lib. II) ad statum canonicum perfectio- nis, satis plene Ecclesia aequiparare statuit Societas, de ipsa et fre- quenter etiam de civili societate optime meritas, quae quamvis aliquibus iuridicis sollemnitatibus ad statum perfectionis canonicum completum necessariis, ut votis publicis (cc. 488, 1º et 7º; 487), carerent, tamen in ceteris quae ad vitam pefectionis substantialia reputantur, veris Reli- gionibus arcta similitudine et veluti necessitate coniunguntur.

His omnibus sapienter, prudenter ac peramanter ordinatis, amplissime provisum fuerat animarum multitudini, quae relicto saeculo am- plecti cuperent novum statum canonicum stricte dictum, perfectioni ad- quirendae unice atque ex integro consecratum. Verum benignissimus Dominus, qui absque personarum acceptione,<sup>10</sup> omnes fideles semel ite- rumque ad perfectionem ubique sequendam et exercendam invitavit,<sup>11</sup> mirabili Divinae suae Providentiae consilio disposuit ut etiam in saeculo, tot vitiis depravato, nostris praecipue temporibus, plures floruerint ac floreant animarum selectarum copiae quae, nedum perfectionis indivi- dualis studio aestuent, sed peculiari Dei vocatione in mundo manentes, optimas novas invenire possint Consociationum formas, temporum neces- sitatibus apprime respondentes, in quibus vitam ducere queant adqui- rendae christianaee perfectioni admodum consentaneam.

Spiritualium Moderatorum prudentiae ac studio ex animo commen- dantes, singulorum nobiles perfectionis conatus, in foro interno, de Asso- ciationibus nunc solliciti sumus quae coram Ecclesia in foro, uti dicitur, externo ad vitam solidae perfectionis proprios sodales quasi manu ducere satagunt atque nituntur. Non tamen de omnibus Consociationibus hic quaestio est, quae in saeculo perfectionem christianam sincero corde sectantur, sed iis tantum, quae in interna constitutione, in hierarchica regiminis ordinatione, in plena nullisque aliis vinculis limitata deditio- ne, quam a membris proprio dictis requirunt, in consiliorum evangelicorum professione, in ratione denique ministeria et apostolatum exercendi, pro- prius quoad substantiam accedunt ad status canonicos perfectionis, ac speciatim ad Societas absque votis publicis (tit. XVII), quamvis non vita communi religiosa, sed aliis, externis formis utantur.

Hae Consociationes, quae inde «Institutorum saecularium» nomine venient, non sine speciali Divinae Providentiae afflatu, primo elapsi saeculi dimidio condi ceperunt, ut fideliter «consilia evangelica in saeculo seque- rentur et caritatis officia maiore libertate obirent, a quibus per temporum

<sup>10</sup> 2 Par. XIX, 7; Rom. II, 11; Eph. VI, 9; Col. III, 25.

<sup>11</sup> Mt. V, 48; XIX, 12; Col. IV, 12; Iac. I, 4.

nequitiam exercendis, religiosae familiae aut paene aut omnino prohibe- bantur».<sup>12</sup> Cum antiquiora eiusmodi Instituta bonum de se specimen dederit, et operibus factisque satis semperque magis comprobarent per severam prudentemque suorum sodalium selectionem, per accuratam sa- tisque longam eorum formationem, per adaequatam, firmam simul et agi- lem vitae ordinationem, etiam in saeculo peculiari Dei vocatione favente, divinaeque gratiae auxilio, obtineri certo posse satis strictam atque effi- cacem suipsius, non internam tantum sed externam et fere religiosam, Do- mino consecrationem, et instrumentum valde opportunum penetrationis et apostolatus haberi, hac multiplici de causa «istae fidelium Societas, non secus ac verae religiosae Congregationes a Sancta Sede laudatae» non se- mel fuerunt.<sup>13</sup>

Ex felici horum Institutorum incremento in dies clarius apparuit quam multiplici respectu eadem in efficax Ecclesiae et animarum subsidium verti possent. Ad vitam perfectionis semper et ubique serio ducendam; ad ipsam etiam in pluribus casibus amplectendam in quibus vita religiosa canonica possibilis vel conveniens non erat; ad impensem familiarum, profes- sionum ac civilis societatis christianam renovationem per contactum intrinsecum et quotidianum cum vita perfecte et omnino sanctificationi consecrata; ad multiformem apostolatum et ad ministeria exercenda lo- cis, temporibus et rerum adiunctis sacerdotibus religiosisque vetitis, vel imperviis, haec Instituta adhiberi et converti facile possunt. Ex adverso, experientia comprobatum est difficultates ac pericula non defuisse, quae haec perfectionis vita libere ducta, et absque externo religiosae vestis subsidio, communisque conviventiae auxilio, absque vigilantia Ordina- riorum, a quibus re ipsa facile ignorari poterat, Superiorumque, qui non raro longe aberant, interdum, immo et faciliter secum ferebat. Disputari etiam coeptum fuit de natura iuridica horum Institutorum, et de Sanctae Sedis mente in illis approbandis. Heic opportunum ducimus mentionem facere illius Decreti «Ecclesia Catholica», quod Saera Congregatio Episco- porum et Regularium edidit, et die XI mensis Augusti a. MDCCCLXXXIX a Decessore Nostro im. mem. Leone XIII confirmatum fuit.<sup>14</sup> In ipso non vetabatur horum Institutorum laudatio et approbatio, edicebatur tamen Sacram Congregationem, quando haec Instituta laudabat vel appro- babat, ea voluisse laudare et approbare, non quidem ut Religiones voto- rum solemnium, aut veras religiosas Congregationes votorum simpli- cium, sed tantum ut pias sodalitates, in quibus, praeter alia, quae iuxta hodiernam Ecclesiae disciplinam desiderantur, religiosa professio proprie- dicta non emittitur, sed vota, si quae fiant, privata censemur, non publica, quae nomine Ecclesiae a legitimo Superiore acceptantur. Haec insuper

<sup>12</sup> S. C. Episcoporum et Regula- rium dec. Ecclesia Catholica, d. 11 au- gusti 1889: cfr. ASS, XXIII, 634.

<sup>13</sup> Ibid.  
<sup>14</sup> Ibid.

sodalitia — ita addebat Sacra eadem Congregatio —, sub hac essentiali conditione laudantur vel approbantur, quod plene perfecteque Ordinariis innotescant cuiusque suis, ac eorum omnino subsint iurisdictioni. Haec Sacrae Congregationis Episcoporum ac Regularium praescripta ac declarations, ad effingendam naturam horum Institutorum opportune contulerunt, eorumque evolutionem atque progressum ordinaverunt quin tamen impedirent.

Nostro hoc saeculo Instituta saecularia multiplicata silenter sunt, pluresque, satis inter se diversas, formas sive autonomas, sive diversimode Religionibus Societatibus unitas induerunt. De ipsis nihil cavit Apostolica Constitutio « Conditae a Christo », quae tantum de Congregationibus religiosis fuit sollicita. Codex etiam Iuris Canonici consulto de his Institutis siluit, et quae pro ipsis essent constituenda, cum adhuc matura non viderentur, reliquit futurae legislationi.

Haec omnia Nobiscum, pro conscientiae Nostrae officio, et pro paterna illa dilectione qua erga animas ferimus, quae in saeculo tam generose sanctitatem sectantur, semel iterumque considerantes; itemque eo consilio ducti ut sapiens nempe ac severa fieri valeat Societatum discriminatio, illaque tantum ut vera Instituta agnoscantur, quae plenam perfectionis vitam authentice profiteantur; ut pericula vitentur erectionis novorum semper Institutorum — quae non raro imprudenter atque inconsulto conduntur —; ut illa autem Instituta, quae approbationem mereantur, tallem obtineat peculiarem iuridicam ordinationem, quae eorum naturae finibus, adiunctis apte pleneque respondeant, id ipsum pro Institutis saecularibus perficere cogitavimus ac decrevimus, quod im. mem. Decessor Noster Leo XIII pro Congregationibus votorum simplicium per apostolicam Constitutionem « Conditae a Christo » tam prudenter atque sapienter praestitit. Igitur statutum generale Institutorum saecularium, quod a Suprema Sacra Congregatione Sancti Officii ad competentiam suam quod spectat, examinatum diligenter fuerat et a Sacra Congregatione de Religiosis accurate, iussu ductuque Nostro, ordinatum ac expolitum fuit, per praesentes has Litteras approbamus; atque ea omnia, quae sequuntur, Apostolica auctoritate Nostra declaramus, decernimus ac constituimus.

Hisce autem ut supra constitutis, ad ea omnia exsecutioni mandanda Sacram Congregationem de Religiosis deputamus, cum omnibus facultibus necessariis atque opportunis.

### *Lex peculiaris Institutorum saecularium*

#### Art. I

Societas, clericales vel laicales, quarum membra, christianaे perfectionis adquirendae atque apostolatum plene exercendi causa, in saeculo consilia evangelica profitentur, ut ab aliis fidelium communibus Associationibus (Pars Tertia, Lib. II, C. I. C.) apte distinguantur, Institutorum seu Institutorum saecularium proprio nomine veniunt, atque huius Constitutionis Apostolicae normis subiiciuntur.

#### Art. II

§ 1. Instituta saecularia, cum nec tria publica religionis vota (cc. 1308 § 1 et 488, 1º) admittant, nec communem vitam seu commemorationem sub eodem tecto suis membris, ad normam canonum, imponant (cc. 487 sqq. et 673 sqq.):

1º Iure, ex regula, nec sunt proprie loquendo dici queunt Religiones (cc. 487 et 488, 1º) vel Societas vitae communis (c. 673 § 1);

2º Religionum aut Societatum vitae communis proprio peculiarique iure non obligantur, neque ipso uti possunt, nisi quatenus aliquod huius iuris praescriptum, illius praecipue quo Societas absque votis publicis utuntur legitime ipsis, per exceptionem, accommodatum fuerit atque applicatum.

§ 2. Instituta, salvis communibus iuris canonici normis quae ipsa respiciant, tamquam proprio iure, peculiari eorum naturae et conditioni arctius respondendi, his praescriptis reguntur:

1º Generalibus huius Constitutionis Apostolicae normis, quae omnium Institutorum saecularium veluti proprium statutum constituunt;

2º Normis quas Sacra Congregatio de Religiosis, prout necessitas ferat atque experientia suffragetur, sive Constitutionem Apostolicam interpretando sive ipsam perficiendo atque applicando pro omnibus vel pro aliquibus ex his Institutis edere censuerit;

3º Particularibus Constitutionibus, ad normam Articulorum qui sequuntur (Art. V-VIII), approbatis, quae generales iuris atque peculiares supra descriptas normas (nn. 1º et 2º), singulorum Institutorum finibus, necessitatibus, adiunctis, non parum inter se diversis, prudenter accommodent.

#### Art. III

§ 1. Ut aliqua pia fidelium Consociatio, ad normam Articulorum qui sequuntur, erectionem in Institutum saeculare consequi valeat, haec (§§ 2-4), praeter alia communia, habeat necesse est requisita:

§ 2. Quoad vitae consecrationem et christianaæ perfectionis professionem.

Sodales, qui ut membra strictiore sensu sumpta, Institutis adscribi cupiunt, praeter illa pietatis et abnegationis exercitia, quibus omnes, qui ad perfectionem vitae christianaæ adspirant, incumbant necesse est, ad ipsam peculiaribus etiam rationibus, quae hic recensentur, efficaciter tendere debent:

1º Professione nempe coram Deo facta coelibatus et castitatis perfectae, quae voto, iuramento, consecratione in conscientia obliganti, ad normam Constitutionum, firmetur;

2º Obedientiae voto vel promissione, ita ut stabili vinculo ligati totos Deo et caritatis seu apostolatus operibus se dedicent, et in omnibus sub manu et ductu semper moraliter sint Superiorum, ad normam Constitutionum;

3º Paupertatis voto vel promissione, vi cuius bonorum temporaliū usum non liberum habeant, sed definitum ac limitatum, ad normam Constitutionum.

§ 3. Quoad incorporationem Sodalium Instituto proprio et quoad vinculum ex ipsa ortum.

Vinculum quo Institutum saeculare et ipsius membra, proprie dicta, inter se coniugi oportet, debet esse:

1º Stabile, ad normam Constitutionum, sive perpetuum sive temporarium, elapso tempore renovandum (c. 488, 1º);

2º Mutuum ac plenum, ita ut, ad normam Constitutionum, Sodalis se totum Instituto tradat, et Institutum de Sodali curam gerat atque respondeat.

§ 4. Quoad communes Institutorum saecularium sedes ac domos.

Instituta saecularia, etsi communem vitam seu commorationem sub tamen pro necessitate, vel utilitate unam vel plures communes domos habere oportet, in quibus:

1º Residere valeant qui Instituti regimen, supremum praecipue vel regionale, exercent;

2º Commorari vel ad quas convenire queant Sodales, ad institutionem accipiendam et complendam, ad exercitia spiritualia peagenda et ad alia huiusmodi;

3º Recipi possint Sodales, qui ob infirmam valetudinem, vel ob alia rerum adiuncta sibi providere non valeant, vel quibus non expediatur, ut apud se vel apud alios ipsi privatim remaneant.

#### Art. IV

§ 1. Instituta saecularia (Art. I) a Sacra Congregatione de Religiosis dependent, salvis iuribus Sacrae Congregationis de Propaganda Fide, ad normam c. 252 § 3, quoad Societates et Seminaria Missionibus destinata.

§ 2. Consociationes, quae rationem non habent seu plene finem non profitentur in Art. I descriptum, illaeque etiam, quae aliquo ex elementis carent in Art. I et III huius Constitutionis Apostolicae recensisitis, iure reguntur Associationum fidelium, de quibus in cc. 684 sqq. et a Sacra Congregatione Concilii dependent, salvo praescripto c. 252 § 3, quoad territoria Missionum.

#### Art. V

§ 1. Instituta saecularia Episcopi, non autem Vicarii Capitulares vel Generales condere et in personam moralem, ad normam c. 100 §§ 1 et 2, origere possunt.

§ 2. Ea tamen Instituta Episcopi ne condant neque condi sinant, in consulta Sacra Congregatione de Religiosis, ad normam c. 492 § 1 et Art., qui sequitur.

#### Art. VI

§ 1. Ut Episcopis, de erectione Institutorum ad normam Art. V § 2 in antecessum consulentibus, Sacra Congregatio de Religiosis licentiam concedat eadem erigendi, de iis, congrua congruis ipsius iudicio referendo, edoceri debet, quae pro erectione Congregationis Societatis vita communis iuris dioecesani in Normis ab eadem Sacra Congregatione impertitis definiuntur (nn. 3-5) atque de aliis quae ex stilo et praxi eiusdem Sacrae Congregationis inducta sunt, vel in posterum inducentur.

§ 2. Obtenta ab Episcopis Sacrae Congregationis de Religiosis licentia, nihil obstabit quominus, ipsi iure proprio uti libere possint et erectionem peragere. De erectione peracta officiale nuntium eidem Sacrae Congregationi Episcopi mittere ne omittant.

#### Art. VII

§ 1. Instituta saecularia, quae approbationem vel laudis decretum a Sancta Sede consequuta fuerint, iuris pontificii efficiuntur (cc. 488, 3º; 673 § 2).

§ 2. Ut Institututa saecularia iuris dioecesani laudis vel approbationis decretum consequi valeant, illa generatim, congrua congruis Sacrae Congregationis de Religiosis iudicio referendo, requiruntur quae ex Normis (nn. 6 sqq.) et ex eiusdem Sacrae Congregationis stilo ac praxi pro Congregationibus et Societatibus vitae communis praescripta et definita sunt, vel in posterum definientur.

§ 3. Ad horum Institutorum eorumque Constitutionum primam, ultiore, si casus ferat, ac definitivam approbationem ita procedatur:

1º Causae, de more paratae et unius saltem Consultoris voto ac dissertatione illustratae, in Consultorum Commissione, sub ductu Excmi eiusdem Sacrae Congregationis Secretarii aliasve ipsius vices gerentis, prima fiet disceptatio;

2º Inde res tota, praeside Emo Sacrae Congregationis Cardinali Praefecto, atque invitatis ad causam diligentius excutiendam, prout necessitas seu utilitas suggestat, peritis seu peritioribus Consultoribus, pleni Sacrae Congregationis Congressus examini ac decisionis subiiciatur;

3º Congressus resolutio ab Emo Cardinali Praefecto vel ab Exmo Secretario Audientia Ssimo Domino referenda Ipsiusque supremo iudicio submittenda erit.

#### Art. VIII

Instituta saecularia, praeterquam propriis, si quae adsint vel in posterum ferentur legibus, ad normam iuris pro non exemptis Congregationibus et Societatibus vitae communis vigentis, Ordinariis locorum subiecta sunt.

#### Art. IX

Regimen internum Institutorum saecularium hierarchice ad instar regiminis Religionum et Societatum vitae communis, congrua congruis eiusdem Sacrae Congregationis iudicio referendo, pro ipsorum Institutorum natura, finibus, et adiunctis ordinari potest.

#### Art. X

Quoad iura et obligationes Institutorum, quae condita iam sunt et ab Episcopi, consulta Sancta Sede, vel ab ipsa Sancta Sede fuerunt approbata, hac Constitutione Apostolica nihil immutatur.

Haec edicimus, declaramus ac sancimus, decernentes pariter Apostolicam hanc Constitutionem firmam, validam et efficacem semper esse a fore, suosque plenos et integros effectus sortiri atque obtinere, contrariis quibuslibet non obstantibus, peculiarissima etiam mentione dignis. Nulli igitur hominum liceat hanc Constitutionem a Nobis promulgatam infringere, vel eidem temerario ausu contraire.

Datum Romae, apud Sanctum Petrum, die II Februarii, Purificationi Beatae Virginis Mariae sacra, anno MDCCCCXXXXVII, Pontificatus Nostri octavo.

PIUS PP. XII

**ANNOTATIONES.** — I. Ex simplici huius splendidi pontificii monumenti lectione, nemini non patebit eius momentum maximum, nedum in ordine perfectionis christianae promovendae, verum, et praesertim, in religiosorum progressu atque evolutione. Duas partes perfecte distinctas comprehendit constitutio, aliam historico-doctrinalem, aliam normativam. Pontificio documento occasionem dedit phoenomenum, quod amplius ignorari non poterat, novarum formarum apostolatus et perfectionis christianaue ubique terrarum pullulantium quae, dum evidenter associationum simplicium fidelium, de quibus III pars Codicis Iuris Canonici libri II loquitur, undequaque exorbitant, inepte etiam normis secundae partis eiusdem libri aptari videbantur. Opus ergo fuit locum proprium eis assignare earumque naturam definire, quod egregie constitutio « Provida Mater Ecclesia » perfecit simul tradens atque luculenter illustrans classicam de statibus perfectionis doctrinam his novissimis temporibus a nonnullis denaturatam.

Ut autem gravissima Romani Pontificis verba in prima Constitutionis parte prolata de statibus perfectionis melius intelligantur, operaे pretium puto aliqua de statibus perfectionis classica seu traditionalia principia summatim referre dum ad fusiorem argumenti tractationem a me scriptam in *Commentarium pro Religiosis* comitem lectorem remitto.<sup>15</sup>

II. Aque imprimis status — graece στάσις — ethimologice *actum standi*, cui motus opponitur dicit;<sup>16</sup> realiter vero, sive proprie sive translate, vox status infinitae pene est significationis. « Attribuitur, ait Suarez, rebus viventibus et non viventibus, rationalibus et irrationalibus, naturalibus et moralibus ».<sup>17</sup> Ipsamet Societas politica *Status* vocatur. Verum propriissime dictus, status est species *praedicamenti positionis* quod a philosophis definitur: « quaedam positionis differentia secundum quam aliquid disponitur secundum modum suae naturae quasi in quadam immobili-

<sup>15</sup> « Commentarium pro Religiosis » (CpR) I, 22 ss., 73 ss., 101 ss. Ibi etiam tum fontes, tum praecipui classici auctores qui materiam hanc funditus tractavere. Noto hic specialiter D. Th., 2-2, qq. 183-189; PASSERINI, harum quaestionum absolutissimum expositorum in opere *De hominum statibus et officiis*, v. I. Romae 1668; SUAREZ, *De Religione*, t. III. Lugduni, 1623; LABRAONA, *Commentarium Codicis CpR.*, II, 135 ss., 168 ss., 171 ss., 201 ss., 275 ss.; SWINTECK, *Elementa status religiosi in Scriptura*, CpR., III, 21 ss. 149 ss.;

JOMBART, *L'essence de l'état religieux*, in « Revue des Communautés religieuses » (RCR), I, 174 ss.; VERMEERSCH, *De status religiosi essentia*, in « Periodica de re canonica et morali » (Per.) XV, (1)-(9); PEINADOR, *Quaestiones iuridicae-morales de statu religioso*, CpR., XII, 261 ss.; XIII, 205 ss.; XIV, 69 ss.

<sup>16</sup> FORCELLINI, *Lexicon totius latinitatis*, verb. *status*, ubi omnes aliae vocabuli ibi relatae significationes primigeniam servant ideam magis vel minus resultantem.

<sup>17</sup> Op. cit., l. I, cap. 1 n. 1.